

Li travô du vegneron du vieü tin

La vegne l' è inkouo indremaïte.

L' an vîn dè keminsié é avoui lui li premié travô dè la vegne. Le tarin l' è inkouo dzalô é rekouevê dè naï.

La taye l' è dètir apri li fite dè fin dè l' an. Le vegneron va lînma le sékateu kâ la lame dai itre tayinte pouo kopâ nèt pouaï i keminse la taye.

Li dzornive du maï dè janvié é fèvraï son kouorte.

Sin kè djon li dikton : rin vô la taye du maï dè mà é pouaï Sin Grégouâr de te pâ : se te veü baïre, taye le doze mà !

Apri i fô amasâ li sarmin pè pakié é li portâ feür pouo li bouerlâ. Din li vegne on vaï parto dè foua kiè dégadj'on onna fougâye blantse.

Pè vè la fin du maï dè mà u le keminsèmin du maï d' avri, l' è le tin di labour din li vegne.

On vaï dè z' ôvraïre é dè z' ôvraï avoui dè petsâ kiè son in trin dè kapi é asebin dè z' omoueu é dè troye avoui dè tsarouye kiè rabouey' on la têt yen'a legne apri l' âtre.

Din li vegne dè guiyô, l' è le mouemin dè yêtâ li sarmin su li fi dè fê. Le tarin keminse a sè tseüdâ, la sève a moutâ, la vegne sè mè a réla pouaï i sè désone to tsôpou. Li z' ouaï kemins'on a gonflâ é, apri karkiè dzo, on vaï li dzevene sarmin, kiè l' on pousô, son porteuze dè noval rape.

U maï dè mé, i fô bouordzonâ, sé travô l' è pouo vouotâ li sarmin dè troua.

In jouïn, din li vegne, on vaï dè koble dè fèmale kiè son in trin dè défouoyé. Sé travô, l' è pouo leu. Dè kou karkiè z' ene son mi morge pouaï on n' avoui barjakâ dè tchui li bié.

Din li vegne in gobelè, i fô yêtâ li sarmin u pasé pouaï kopâ li bè. U dzo dè vouaï to hleü travô son mekanizô.

Li sulfatâdze, din le tin, sè faziv'on avoui la bouoye a dô d' omoueu, apri son arevô li z' atomizeu é li ponpe a mouoteu. U dzo dè vouaï l' è l' élikoptaïre kiè l'a rinplasia to sin. Kin l' on keminsia, li z' ékouolô l' on kreyô u skandal mi l' è provô kiè l' épantche min dè prodjeu su li vegne. Dékouté li maïzon i no fô teti inplèyé l' atomizeu é asebin pouo fire li trètèmin dè la rape.

Din le tin u maï dè sètibre, on vèyeve dèvan li maïzon é dézo li sotô dè kise in bou, dè bouosè pouaï dè brinde. Le vegneron dèlive li z' inplâ d' ivoueu pouo li z' abouonâ pouo li venindze. Vè li grô martchan dè vîn no vèyesin dè tsarè avoui dè grôse bosète plène d' ivoueu pouo li bouonâ.

Pouo le vegneron, li venindze, l' è le tin fâ dè l' an, l' è sé di rekonpinse, di retrovâye é dè la fite.

To li z' outi in bou son rinplasia pè dè meüble in plastek dè tote li kouoleu.

Mè n' é dè biô sovèni kan yeu menâve bâ, vè Provîn, li venindze di Pri avoui la vatse d' inplaïte.

Fèvraï dou mel kînze

Sé dè Dorman